


ALAHADY NY NISEHOAN'NY TOMPO na EPIFANIA 2026



“ Izaio tontolo izao no irin’Andriamanitra ho Eglizy fianakaviany ”

Ry Kristianina havana, mbola ao anatin’ny fankalazana ny Noely isika, Andriamanitra eo anivontsika, Andriamanitra miseho amintsika. Amin’izao Alahady Epifania fankalazana ny nisehoan’ny Tompo izao dia mbola anatin’ny Noely. Niseho tamin’ny vahoakany izy Tompo dia ilay vahoaka feno fahamarinana, fanetren-tena sy fahatsoram-po dia i Maria sy Josefa

izay fianakaviana voafidy hiainany ny maha-olombelona azy ary ireo mpiandry ondry nanambaran’ny anjely fa misy zaza teraka ao Betlehema, ny anarany atao hoe Emanoela. Fa ireo mpiavonavona kosa dia tsy afaka nandray azy, hitantsika ireo mpandray vahiny nilaza fa tsy nisy

Vakiteny I : Iz. 60, 1-6

Tononkira : Salamo 71

Vakiteny II : Efezianina 3, 2-3a. 5-6

Evanjely : Mt. 2, 1-12

toerana ho azy ireo tao an-trano, tahaka an’l Heroda izay namono ny zaza tsy manantsiny. Toetrantsika olombelona izany, vokatry ny avonavona dia mifody ny fontsika ka tsy afaka mandray izay tena fahasambarana.

Amin’izao Alahady ankalazantsika an’l Jesoa eo anivontsika izao dia mampibaribary fa tsy ny vahoakan’Andriamanitra fotsiny no tadiaviny sy irin’Andriamanitra ho fianakaviany sy ho olona velona ho olona iray ao aminy fa izao tontolo izao. Izany no ambaran’lzaia mpaminany ao amin’ny vakiteny voalohany *“Mitsangàna, ka mamirapirata, ry Jerosalema, fa miposaka*

ny fahazavanao; ary miposaka eo aminao ny fahazavan'ny Tompo. Indro ny haizina fa manarona ny tany, ary ny haizim-pito manarona ny firenena; fa ny Tompo kosa no miposaka eo aminao; ary ny voninahiny miseho eo aminao. Mandroso eo amin'ny fahazavanao ny firenena ary ho eo amin'ny famirapiratan'ny fiposahanao ny mpanjaka". Jerosalema tanàna masina, tanànan'ny fiadanana, Jerosalema vaovao izay hitondra fiadanana vaovao ho antsika ka enga anie ny fankalazantsika ny Epifania fa indrindra amin'izao famaranana ny taon-jobilin'ny Fanantenana izao sady fiatrehantsika ny Sinaody faha-7 fijanonana faha-4 izao. Izao fankalazana izao anie hanampy antsika hiombona bebe kokoa amin'Andriamanitra sy ao amin'i Jesoa. Izany no ambaran'ireo Majy izay avy any atsinanana namakivaky ny firenena maro ho an'ny Betlehema hitsaoka ny zanak'Andriamanitra.

Ny fampianarana azontsika tsoahina dia tsy ampy raha ny ezaka ataontsika fotsiny, ilaina ny ezaka, mila angovo sy fahaizana ny fihavaozana sy fanavoazana ary fanarenana eto anivon'ny firenena. Tsy afenina fa io ihany koa ny tanjon'izao Sinaody izao. Noho izany mila ezaka tokoa fa ny tena ilaina dia fananana masom-pinoana hahitana an'ilay Kintana mitarika antsika eo amin'i Jesoa. Tanteraka izany raha manana fahavonona isika ka manolo-tena ao anatin'ny ny fanetren-tena tsilovin'ny Fanahy Masina. Mila ny fitsilovan'ny Fanahy masina isika, matetika isika mihevitra fa araky ny famakiana ny Tenin'Andriamanitra sy ny ezaka ataontsika dia efa ampy amin'ny firaisam-po amin'Andriamanitra. Ilaina ireny ary mampirisika ny fianakaviana rehetra mba hanana Baiboly isan-tokantrano sy hamaky ny tenin'Andriamanitra miaraka fa raha tena te-hahita ny lalan-kombàna isika dia ekeo am-panetren-tena ny fitsilovan'ny Fanahy Masina.

Tsara ny manamarika izany amin'izao isika miatrika ny zava-misy eo amin'ny firenena sy isika miatrika ny Sinaody izao. Matetika isika no milaza tsy misy zavatra kisendrasendra. Tena eo amin'ny kihon-dalana tokoa isika izao. Ka mila mivavaka mila masom-pinoana, mila fanetren-tena sy fahatsorana raha te-hifanojo amin'i Jesoa marina isika. Nanaiky notarihin'ny kintana ireo majy satria na dia manam-pahaizana aza dia tsy mirehareha fa feno fanetren-tena ka tonga tao Jerosalema, nanontany an'i Heroda izy ireo “ *“Aiza ilay Mpanjakan'ny Jody vao teraka? fa efa nahita ny kintany tany Atsinanana izahay, ka nankaty mba hitsaoka Azy”.*”, “ *Dia nalain'i Herôda mangingina ny Majy, ka nohadihadîny fatratra ny andro nisehoan'ny kintana taminy. Ary naniraka azy ho any Betlehema izy nanao hoe:“Andeha ka fotopotory tsara ny amin'ilay Zaza; ary rehefa hitanareo, dia ilazao aho mba hankanesako any koa hitsaoka Azy”.* Hitantsika ny toetr'izao tontolo izao izay mifanohitra amin'ny fahendrena avy amin'Andriamanitra. Misy fampianarana azontsika asongadina. Aza matoky ny olona maro samihafa isika fa matokia ny fitsilovan'ny Fanahy Masina, ny fampianaran'ny Eglizy, izany no maha-katolika antsika. Atoron'ny Eglizy antsika ny lalan-kombàna. Heroda nametraka fanontaniana satria efa nisy zava-nokinendry hafa izy fa ireo majy kosa notsilovan'ny Fanahy Masina rehefa tonga tao Betlehema ka tsy voafitak'i Heroda intsony. Tsy niverina ireo majy fa nanohy ny lalany nody. “ *Ary rehefa notoroan'Andriamanitra hevitra tamin'ny nofy izy ireo tsy hiverina any amin'i Herôda, dia lalan-kafa no nalehany nody ho any amin'ny fonenany.”*

Heroda azo lazaina fa manambara an'izao tontolo mpanjakazaka, mpamoritra, mpamono olona, feno fanontaniana izy nefa tsy nisy fahavononana hibebaka ny fanontaniana fa noho ny fony feno fialonana sy avonavona, fitiavan-tena. Mbola manjaka izany amin'izao vanimpotoantsika izao. Ireo majy kosa nibebaka satria tsy nanaraka ny torohevitr'i Heroda fa nanaraka ny kintana ka nahita ny zanak'Andriamanitra. Tandremo fa mbola maro ny Heroda mety mampiseho lalan-diso fa indrindra isika amin'izao kihon-dalana eo amin'ny firenena izao

Milaza i Matio ao amin'ny Evanjely fa faly dia faly ireo majy nahita ny kintana ka rehefa niditra tao an-tranon'omby izy ireo dia nahita an'i Maria sy Josefa ary i Jesoa zazakely ka niankohoka nitsaoka azy. Hafaliana tokoa rehefa mihaona amin'i Jesoa. Enga anie hahita hafaliana mandrakariva isika isaky ny mankalaza ny Eokaristia satria fihaonana amin'i Jesoa. Raha misy faniriana ho an'ny tanidrazantsika amin'izao kihon-dalana izao dia enga anie na ny mpitondra na ny vahoaka hahita ny kintana hitarika hitondra amin'ny tena famonjena fa tena mijaly....

Ahoana ny hahafantarana fa mihaona amin'i Jesoa ? Mahita ny asan'ny Fanahy Masina isika rehefa feno hafaliana sy haravoana. "Mifalia mandrakariva ao amin'ny Tompo" hoy i Md Paoly ao amin'ny taratasiny tany Filipiana. Hafaliana sy fiadanana no niainan'ireo majy raha nahita an'i Jesoa izy ireo ilay fampanantenana amin'ny hiran'ny voninahitra ataontsika "voninahitra, voninahitra fiadanana eto an-tany e, handeha isika hitsaoka izany mpamonjy vao teraka, izy ilay nandrasana". Nahafoy ny tena sarobidy tamin'izy ireo ny majy, ny volamena manambara ny maha-mpanjaka, ny emboka masina manambara ny maha-Andriamanitra ary ny mira manambara ny fahambonian'olona rehefa tonga ny fahafatesana. Manambara fahafoizana izany rehetra izany, nahita an'Andriamanitra izy ireo, henontsika izany tamin'ny tantaran'i Zake, Abrahama, Paoly samy mahafofy, izay manambara ny fiombonana amin'Andriamanitra, manolotra izay sarobidy aminao amin'Andriamanitra, izany ny fiainana maha Kristianina antsika.

Enga anie amin'izao fiatrehantsika ny Fihaonambem-pirenana izao, amin'izao Sinaody izao, amin'izao symposium mikasika ny fanabeazana izao mba hifanojo amin'i Jesoa tokoa isika. Tanteraka izany raha samy mahafofy isika tahaka an'ireo majy. Raha tiansika ho noely mandrakariva ny fiainantsika dia aoka isika ho feno hafaliana sy haravoana ary mahafofy. Raha mahafofy tokoa isika dia araky ny voalazan'ny vakiteny faharoa dia iray lova sy ho tena iray ao amin'i Kristy *"Ny Jentily dia tonga iray lova sy iray tena ary mpiombona ny fampanantenana amin'ny Jody ao amin'i Kristy Jesoa, noho ny ninoany ny Evanjely."* Izany hoe olona araiky ao amin'i Kristy ka hiroso lalindalina kokoa amin'ny fiainana maha Kristianina antsika ka ho tanteraka tokoa ny hoe katolika aho ka halaliniko ny finoako, katolika aho ka iainako izay inoako, katolika aho ka raisiko an-tànana izay inoako, katolika aho ka ho zaraiko amin'ny hafa ny finoako, katolika aho ka ankalazaiko izay inoako ka tanteraka tokoa ny maha generation mpanorina antsika.

Ry Jesoa Tompo ô, tsy olom-bitsy no antsoinao hanatona anao fa ny olon-drehetra eto ambany masoandro, solontenanay ireo majy, indreto izahay ka ampio mba hanaraka ny fampianaranao, hanatanteraka ny sitraponao, ianao no kintana mitarika anay amin'ny fiainanay, ampio izahay hahita anao mandrakariva ka hahatonga anay hahafoy ho an'ny hafa hikatsaka ny soa iombonana ka ho generation mpanorina izahay, ho Eglizy Olona Velona sy Eglizy Tranon'Andriamanitra mifampitsimbina, mifanasoa. Masina Maria tantano ny dianay ho any amin'I Jesoa ka ho vonona hamafy fanantenana, fiadanana, fihavanana sady kristianina no Malagasy. Md Josefa, Ray Mpiaron'ny Eglizy eran-tany ianao, ampianaro izahay hahay hiaro ny finoanay izahay eo anivon'ny rivotra mitsoka manohitra ny finoana. Amen

Mompera Arseveka Benjamin Ramaroson